



Ročište za trojku iz Prijedora

Zatražen pritvor za Mrđu, Marinovića i Gavrilovića

Za Darka Mrđu, Radenka Marinovića i Milana Gavrilovića, nakon što ih je tužilac ispitao, zatražen je jednomjesečni pritvor, o čemu će se Sud BiH danas izjasniti.

Mjera pritvora prema osumnjičenima predložena je zbog opasnosti da bi boravkom na slobodi mogli ometati istragu, prikrivati dokaze ili vršiti utjecaj na svjedoke ili saučesnike, saopćeno je iz Tužilaštva Bosne i Hercegovine.

Četvrta osoba u okviru ovoga predmeta je Zoran Babić, zvani Bakin. Ali on se već nalazi u zatvoru na izdržavanju ranije izrečenih kazni za zločine počinjene

na Korićanskim stijenama i zbog strijeljanja deset Prijedorčana ispred džamije u Čarakovu, među kojima je bio i imam Sulejman ef. Dizdarević.

Babić je osuđen na 35 godina zatvora.

U akciji pripadnika Državne agencije za istrage i zaštitu (SIPA) na području Prijedora su uhapsili u ponedjeljak u ranim jutarnjim satima Mrđu, Marinovića i Gavrilovića.

Ova trojka iz Prijedora se tereti za ratne zločine počinjene na širem području tog grada 1992. godine. Između ostalog, terete se za mučenja i ubistva logoraša u Manjači i Omarskoj. DŽ. S.-K.